

ÁKVÖRDUN SAMEIGINLEGU EES-NEFNDARINNAR
nr. 319/2021

frá 29. október 2021

um breytingu á bókun 31 (um samvinnu á sérstökum sviðum utan marka fjórþætta frelsisins) og bókun 37 (sem inniheldur skrána sem kveðið er á um í 101. gr.) við EES-samninginn

SAMEIGINLEGA EES-NEFNDIN HEFUR,

með vísan til samningsins um Evrópska efnahagssvæðið („EES-samningurinn“), einkum 86. gr. og 98. gr.,

og að teknu tilliti til eftirfarandi:

- 1) Rétt er að auka umfang samstarfs aðilanna að EES-samningnum þannig að það taki til reglugerðar Evrópuþingsins og ráðsins (ESB) 2021/696 frá 28. apríl 2021 um að koma á fót Geimvísindaáætlun Sambandsins og Stofnun um geimvísindaáætlun Evrópusambandsins sem og um niðurfellingu á reglugerðum (ESB) nr. 912/2010, (ESB) nr. 1285/2013 og (ESB) nr. 377/2014 og ákvörðun nr. 541/2014/ESB ⁽¹⁾.
- 2) Rétt er að þátttaka EFTA-ríkjanna í starfsemi sem leiðir af reglugerð Evrópuþingsins og ráðsins (ESB) 2021/696 hefjist frá 1. janúar 2021, óháð því hvenær þessi ákvörðun er samþykkt, eða hvort tilkynnt er eftir 10. júlí 2021 að stjórnskipuleg skilyrði, ef þau eru til staðar, að því er þessa ákvörðun varðar, hafi verið uppfyllt.
- 3) Aðilar með staðfestu í EFTA-ríkjunum skulu eiga rétt til þátttöku í starfsemi sem hefst áður en þessi ákvörðun öðlast gildi. Kostnaður sem fellur til vegna slíkrar starfsemi, sem kemur til framkvæmda eftir 1. janúar 2021, kann að teljast hæfur með sömu skilyrðum og þeim sem gilda vegna kostnaðar sem fellur til hjá aðilum með staðfestu í aðildarríkjum ESB, að því tilskildu að þessi ákvörðun öðlist gildi áður en viðkomandi aðgerð lýkur.
- 4) Skilyrði fyrir þátttöku EFTA-ríkjanna og stofnana þeirra, fyrirtækja, samtaka og ríkisborgara í áætlunum Evrópusambandsins eru sett fram í EES-samningnum, einkum 81. gr. samningsins.
- 5) Samningsaðilarnir viðurkenna formlegt samstarf sem er fyrir hendi í ýmsum geimvísindaáætlunum ESB. Óska þeir eftir því að byggja á hinu öflugra samstarfi og auka að umfangi svo það taki til allra viðeigandi hluta nýju geimvísindaáætlunarinnar.

⁽¹⁾ Stjtið. ESB L 170, 12.5.2021, bls. 69.

- 6) Að því er varðar þátttöku Noregs ætti einnig að taka mið af samstarfssamningi um leiðsögukerfi um gervihnött milli Evrópusambandsins og aðildarríkja þess og Noregs ⁽²⁾.
- 7) Því ber að breyta bókun 31 og 37 við EES-samninginn til samræmis við þetta, svo hið aukna samstarf geti hafist frá 1. janúar 2021,

TEKIÐ EFTIRFARANDI ÁKVÖRÐUN:

1. gr.

Eftirfarandi er bætt við á eftir mgr. 8d í 1. gr. bókunar 31 við EES-samninginn:

„8e. a) EFTA-ríkin skulu frá 1. janúar 2021 taka þátt í starfsemi sem kann að leiða af eftirfarandi lagagerð Sambandsins og í Stofnuninni um geimvísindaáætlun Evrópusambandsins, hér eftir „stofnunin“, nema starfsemi GOVSATCOM og SSA SST, sem fer fram samkvæmt eftirfarandi lagagerð Sambandsins:

- **32021 R 0696:** Reglugerð Evrópuþingsins og ráðsins (ESB) 2021/696 frá 28. apríl 2021 um að koma á fót Geimvísindaáætlun Sambandsins og Stofnun um geimvísindaáætlun Evrópusambandsins sem og um niðurfellingu á reglugerðum (ESB) nr. 912/2010, (ESB) nr. 1285/2013 og (ESB) nr. 377/2014 og ákvörðun nr. 541/2014/ESB (Stjtið. ESB L 170, 12.5.2021, bls. 69).

b) EFTA-ríkin skulu taka þátt í kostnaði í tengslum við starfsemi sem um getur í a-lið í samræmi við a-lið 1. mgr. 82. gr. samningsins og bókun 32 við samninginn.

c) Fjárframlagið sem vísað er til í b-lið skal einnig standa straum af kostnaði við að gera EFTA-ríkin hluta af EGNOS-áætluninni og að umfang þjónustu EGNOS nái einnig til yfirráðasvæðis EFTA-ríkjanna sem eru þátttakendur. Þessi útvíkkun á drægisvæði skal vera með fyrirvara um tæknilegar forsendur og skal ekki seinka útvíkkun á landfræðilegri þekjun EGNOS-kerfisins á yfirráðasvæði aðildarríkja ESB sem er landfræðilega staðsett í Evrópu.

d) Kostnaður sem fellur til vegna starfsemi sem kemur til framkvæmda eftir 1. janúar 2021 kann að teljast hæfur frá og með upphafsdegi viðkomandi aðgerðar sem ákveðin er í styrksamningi eða viðkomandi ákvörðun um styrk, með þeim skilyrðum sem þar koma fram, að því tilskildu að ákvörðun sameiginlegu EES-nefndarinnar nr. 319/2021 frá 29. október 2021 öðlist gildi áður en aðgerðinni lýkur.

⁽²⁾ Stjtið. ESB L 283, 29.10.2010, bls. 12.

- e) EFTA-ríkin sem uppfylla skilyrði skulu taka fullan þátt, án atkvæðisréttar, í stjórn stofnunarinnar.
- f) EFTA-ríkin sem uppfylla skilyrði skulu taka þátt, án atkvæðisréttar, í öryggisviðurkenningarstjórn stofnunarinnar, að því er varðar viðeigandi hluta áætlunarinnar og með takmörkunum í samræmi við stefnu varðandi vitneskjupörf sem áætlunin setur.
- g) Stofnunin er lögaðili. Hún skal njóta í öllum ríkjum samningsaðila ítrasta réttþæfis og gerþæfis lögaðila samkvæmt löggjöf samningsaðila.
- h) EFTA-ríkin skulu láta stofnunina og starfsfólk hennar njóta sérréttinda og friðhelgi með hliðstæðum hætti og kveðið er á um í Bókun um sérréttindi og friðhelgi Evrópusambandsins.
- i) Þrátt fyrir ákvæði a-liðar 2. mgr. 12. gr. og a-liðar 3. mgr. 82. gr. ráðningarskilmála annarra starfsmanna Evrópubandalaganna er forstjóra stofnunarinnar heimilt að gera ráðningarsamning við ríkisborgara EFTA-ríkjanna sem njóta óskertra borgaralegra réttinda.
- j) Þrátt fyrir ákvæði e-liðar 2. mgr. 12. gr., e-liðar 3. mgr. 82. gr. og 3. mgr. 85. gr. í ráðningarskilmálum annarra starfsmanna Evrópusambandsins, skal stofnunin, að því er varðar starfsfólk hennar, líta á tungumálin sem vísað er til í 1. mgr. 129. gr. EES-samningsins sem tungumál Sambandsins sem vísað er til í 1. mgr. 55. gr. sáttmálans um Evrópusambandið.
- k) Skal VII. hluti samningsins (Ákvæði um stofnanir) gilda um þessa málsgrein, með skírskotun til 3. mgr. 79. gr. Samningsins, að frátöldum ákvæðum 1. og 2. þáttar 3. kafla.
- l) Við beitingu þessarar reglugerðar skal reglugerð Evrópuþingsins og ráðsins (EB) nr. 1049/2001 frá 30. maí 2001 um almennan aðgang að skjölum Evrópuþingsins, ráðsins og framkvæmdastjórnarinnar einnig gilda um þau skjöl stofnunarinnar sem varða EFTA-ríkin.
- m) EFTA-ríkin sem uppfylla skilyrðin skulu taka fullan þátt, án atkvæðisréttar, í nefndum Sambandsins sem eru framkvæmdastjórn Evrópusambandsins til aðstoðar við stjórnun, þróun og framkvæmd þeirra þátta sem varða Galileo, EGNOS, Copernicus og undirþátta SSA SWE og SSA NEO starfseminnar sem vísað er til í a-lið.
- Þátttaka í öryggistilhögun þessara nefnda skal takmörkuð í samræmi við stefnu varðandi vitneskjupörf sem áætlunin setur.
- n) Liechtenstein skal undanþegið þátttöku í og fjárframlagi til þessarar áætlunar.“

- o) Ísland skal taka þátt í og leggja fjárframlag til eftirfarandi starfsemi innan áætlunarinnar: EGNOS, Copernicus, og undirþátta SSA SWE og NEO.“

2. gr.

Eftirfarandi breytingar eru gerðar á bókun 37 við EES-samninginn:

1. Texti 36. og 37. liðar fellur brott,
2. eftirfarandi lið(um) er bætt við:

„44. Öryggisviðurkenningarstjórn Stofnunar um geimvísindaáætlun Evrópusambandsins (reglugerð Evrópuþingsins og ráðsins (ESB) 2021/696).

45. Stjórn Stofnunar um geimvísindaáætlun Evrópusambandsins (reglugerð Evrópuþingsins og ráðsins (ESB) 2021/696).“.

3. gr.

Ákvörðun þessi öðlast gildi daginn eftir að síðasta tilkynning, samkvæmt 1. mgr. 103. gr. EES-samningsins, hefur farið fram (*).

Hún kemur til framkvæmda frá 1. janúar 2021.

4. gr.

Ákvörðun þessi skal birt í EES-deild *Stjórnartíðinda Evrópusambandsins* og EES-viðbæti við þau.

Gjört í Brussel 29. október 2021.

Fyrir hönd sameiginlegu EES-nefndarinnar

Rolf Einar Fife

forseti.

(*) Engin stjórnskipuleg skilyrði gefin til kynna.